



叅定朱子語類經說



漢書門		九	九	九	九	九
		二	一	一	一	一
冊	架	函	號	類		

內閣文庫			漢書
九	九	九	
二	一	一	
冊	架	函	號

內閣文庫		
番號	漢	9409
冊數	20 (12)	
函號	298	253



朱子語類大全集卷

二 淺草文庫

論語下

先進篇

先進於禮樂章

一則


問禮樂還說宗廟朝廷以至州閭鄉黨之禮樂曰

不專指此日用之間一禮一樂皆是禮樂只管

文勝去如何收煞須有箇變轉道理如今日事

都侈靡某在南康時通上位書啓只把紙封後

來做書盃如今盡用紫羅背盃內用真紅事事



朱子語類

論語下

如此如何收煞

問子侍側章 二則

問子路甚不明於大義，豈有子拒父而可仕，曰：然。但誤處不在致死之時，在委贄之始。但不知夫子既教之以正名，而不深切言其不可仕，衛何歟。若冉有子貢，則疑而問之，有思量。子路則麓率。

人最怕資質弱，若過於剛，如子路，雖不得其死，百世之下，其勇氣英風尚足以起頑立懦。若冉有

之徒，都自扶不起。如云：可使足民，他豈不知愛民而反為季氏聚斂，只緣以仕為急，遂從其惡。

子路使子羔章 一則

問子路未易屈者，當時亦仕於季氏，蓋季氏知尊敬之，曰：不當仕時，便尊敬也不仕，若是箇賊來，尊敬還從他不從他。觀夫子不知所以裁之之語，正欲其他理會在。

子路曾皙章 七則

問曾點浴沂氣象，與顏子樂意相近，否曰：顏子較

恬靜無許多事。顏子是孔子稱他樂。他不曾自
說道我樂。按曾點亦不曾說我樂。但顏子只認
真用工夫。並不曾道及光景遊眺。
所謂天理流行。須是先自盡於一心。然後及物。則
能隨寓而樂。如曾點他先自分內見得箇道理。
如暮春以下。是無可說。只就眼前境界說出來。
曾點浴沂詠歸樂。而得其所。與聖人安老懷少。信
朋友。使萬物各遂其性。意思相似。這道理是天
生自然。不待安排。惟曾點見得到這裏。聖人做
得到這裏。

問曾點言志如何。是有堯舜氣象。曰。明道云。萬物
各遂其性。此一句。正好看堯舜氣象。且看暮春
時。物態舒暢如此。曾點情思如此。便是各遂其
性。處堯舜之心。亦只要萬物皆如此。爾孔子之
志。欲得老者安之。朋友信之。少者懷之。亦是此
意。
曾點是未行而先見得此意思者。緣見得快。所以
不將當事。
使曾點做三子事。未必做得。然曾點是處。雖堯舜

事業亦不過以此爲之而已。

曾哲不可學。學他便會狂了。他父子之學正相反。

曾子是一步步踏實去做。闡一貫亦只是唯而

已。不曾恁地差異。從此後也只是穩穩帖帖去。

臨死尚曰。吾知免夫。依舊戰戰兢兢。不曾恁地

自在。

顏淵篇

顏淵問爲仁章 十六則

問克已工夫全在克字上。蓋就發動處克將去。必

因有動而後天理人欲之幾分。曰如此則未動

以前不消用力。不成只打瞌睡。懵懂待有私欲

來時。旋捉來克。不亦晚乎。發時固用克。未發時

也須致其精明。如烈火之不可犯。始得。

克已復禮。不可將理字來訓禮字。克去已私。固即

能復天理。不成克已後便都沒事。惟是克去已

私了。恰好著精細工夫。聖人。不只說克已爲仁。

須說克已復禮爲仁。見得禮便事事有箇自然。

底規矩準則。佛家儘有能克已者。雖謂之無已。

私可也。却不曾復得禮。只見得空底。人若但知克己。則下梢必墮於空寂。

克己是大做工夫。復禮是事事皆落腔窠。禮者天理之節文。起居動作莫非天理。于此處渾全是禮。則是仁。有一處不合節文。便是欠闕。若克去己私。而安頓不著。便是不入他腔窠。

問如此則克己復禮。分明是兩節工夫。曰。也不用做兩節看。但不會做工夫底。克己了。猶未能復禮。會做工夫底。才克己。便復禮也。

禮是自家本有底。所以說復。不是待克了己。方去復禮。克得一分人欲去。便復得一分天理來。人只有天理人欲兩途。不是天理。便是人欲。却無不屬天理。又不屬人欲底一節。且如坐如尸。是天理。跛倚是人欲。克去跛倚。而未能如尸。卽是克得未盡。不可謂未能如尸之時。不係人欲也。此須是立箇界限。將那未能復禮底。都只把做人欲斷定。私欲之難克。有不奈他何時。有與他做一片時。



目不視邪色。耳不聽淫聲。如此類工夫。却易視遠。惟明才不遠。便是不明。聽德惟聰。才非德。便是。不聰如此類工夫。却難。

伊川言敬則無已可克。孔門只有箇顏子。孔子且使之克已。如何便會不克。

呂與叔說克已。從那已物對處克。此說雖好。然夫子說底。是未與物對時。若與物對方克。却是自家已倒了幾多。所謂已。只是自家心上不合理底。便是不待與物對。克已銘只說得一邊。

克已復禮。正如疏導溝渠。初為物壅蔽。才疏導得通。則水自流行。克已復禮。便是疏導意思。流行處。便是仁。

問顏子地位。有甚非禮處。何待下此四勿工夫。曰。只心術間。微有些子非禮處。也須用淨盡截斷。了他力量大。聖人便教他索性克去。譬如賊來了。顏子是進步與之廝殺。教仲弓以敬恕。是教他堅壁清野。截斷路頭。顏子是近前與他一刀兩斷。仲弓是一面自守。久而賊自遁去。只是一箇。

道理

問非禮勿視聽言動程子以爲制之於外以安其
內却與克伐怨欲不行相似曰克已工夫其初
如何便得自然也須著禁制到熟後私意自漸
漸消磨去矣今人須要揀易底做然不自難處
入如何得到易處所謂非禮勿者只要勿爲耳
眼前是非阿誰不知只是冒然去做若於眼前
識得底不肯去做便旋旋見得細密底道理蓋
天下事有似是而實非者亦有似非而實是者

若不從明白底做將來這細密底又如何得會
自見。

問天下歸仁克已銘謂洞然八荒皆在我闕集注
却云天下之人皆與其仁程子曰克已復禮則
事事皆仁故曰天下歸仁此意又是如何曰某
向日也只同欽夫之說今却從伊川說孔子直
是以二帝三王之事許顏子此是微言自可意
會孔子曰雍也可使南面當其問仁亦以在邦
無怨在家無怨告之

問程子曰事事皆仁故曰天下歸仁曰一日克已復禮雖無一事亦不害其爲事事皆仁雖不見一人亦不害其爲天下歸仁。道理出來處只是一源散見事物都是一箇做出見得透徹後都是天理理會不得則一事各自是一事一物各自是一物。艸木各自是草木不干自己事。

仲弓問仁章 三則

乾卦自君子進德修業以至於知至知終從知處

說來坤則但說敬以直內義以方外只就持守處說只說得一截如顏子克已復禮工夫却是從頭做來是先要見得後却做去仲弓只是據見成本子做不問前一截了。或問伊川未出門未使民時如何曰此儼若思時也。聖人之言得他恁地說也好使其答之則但云公且去出門如見大賓使民如承大祭果能如此未出門使民以前自住不得了。問已所不欲勿施於人是恕如以刑罰加人豈人

所欲先生曰伊川云恕字須兼忠字說忠是盡已盡已而後為恕以刑罰加人其人實有罪其心亦自以為當然故以刑加之而非強之以所不欲也其不欲被刑者乃其私心若其真心既已犯罪亦自知其當刑矣今人只為不理會忠而徒為恕其弊只是姑息張子韶云聖人因已之難克而知天下皆可恕之人則至於彼此皆自恕而已

足食足兵章 一則

民無信不立是民自不立有信則相守而死無信則相欺相詐臣棄其君子棄其父各自求生路去

棘子成章 一則

棘子成全說質固未盡善子貢說文以矯子成又錯若虎皮羊皮雖除了毛畢竟自別事體不同使一箇君子與一箇屠販之人相對坐竝不以文見畢竟兩人自別文固不可無還當以質為本

子路篇

衛君待子章二則

問夫子得政於衛須有所廢立否曰只是說與他令自為去就亦難為追逐之

問衛君用孔子孔子若既為之臣胡氏之說亦可通否曰聖人必不肯北面無父之人若輒有意改過遷善則孔子須先與斷約如此方與他做姚崇猶先以十事與明皇約然後為之相而況孔子乎若輒不能孔子決不為之臣矣

誦詩三百章一則

問誦詩三百何以見其必達於政曰其中所載可見如小夫賤隸閭巷鄙俚之事君子耳目所不及者其情狀皆可因此而知之而聖人所以修德於已施於事業者莫不悉備於其間讀誦諷詠如是為善如是為惡待施以治人如是當賞如是當罰莫不備見如何於政不達問必能專對曰於詩有得必於應對言語之間委曲和平苟有用我章一則

聖人爲政一年之間想以前不好底事都革得盡。到三年方做自家底。便財足兵強。教行民服。按一年以前雖革前人之弊已之設施作用亦即在焉。除苛必布澤。革故必鼎新。難以一年三年之間分截人我。

君子泰而不驕。章一則。

漢高有箇龕龕底泰而不驕。雖胡亂罵人。却無許多私意。唐太宗好作聰明。與人辯。便有自恃欺負人底意思。

善人教民七年。章一則。

向來因有賊盜之害。嘗議起保伍。彼時也商量一箇計畫。因賊散不行。後來思之。若行亦有害。蓋纔行此。便著教他習武事。這裏人已足殺人底。更教得他會。越要殺人。如司馬溫公嘗行保伍之法。春秋教習。以民爲兵。後來所教之人。歸更不理會農務。生計。只管在家作鬧。要酒物喫。其害亦不淺。古人兵出於民。先教之以孝弟忠信。而後驅之於此。所以無後來之患。按古者人人人是農。後來派定一人習兵。卽不肯復歸耕矣。便有好鬪好飲酒之患。

憲問篇

憲問恥章

一則

邦有道之時、不能有為、只小廉曲謹、濟得甚事、如
 舊日秦檜當國、有人壁立萬仞、和宮觀也不請、
 似是世間第一等人、及秦死、用為臺諫、不過能
 論貪污而已、於國家大計、無所建立、所以宗族
 稱孝、鄉黨稱弟、是至好人、而聖人必先之以行、
 已有恥、不辱君命、為上、蓋須是以孝弟為本、又
 能克其固有之良心、到有恥、不辱君命、處方是。

克伐怨欲章

六則

克伐怨欲不行、譬如停賊在家、豈不為害、若便趕
 將出去、則禍根絕矣、
 不行則是遏在胸中、人面前不行、畢竟有這物在
 裏、人於身上有不好處、須是剷除、問身上病痛、
 閑時自謂都無、才感物、便發出來、如何除得、曰、
 當其發時、便剷除去、剷除熟後、自然會無、才發
 便剷、自到熟處、
 不行是禁制之、未能絕去根苗、但要見得絕去根

苗底是如何用功。這禁制底是如何用功。分別這兩般功夫是如何。

克伐怨欲須要無。只看大底道理。這許多病自無。

問莫是見得人已一體。則求勝之心自無。見得

事事皆已當為。則矜伐之心自無。見得死生有

命。富貴在天。則怨欲之心自無。曰固是。然已是

第二著。問莫是見得天地同然。公共底道理否。

曰亦是。第二著。若見得本來道理。不待說與人

公共。不公。只自家身上。是勝箇甚麼。伐箇

甚麼。怨欲箇甚麼。

問水火明知其可畏。自然去之。人欲只緣有愛之

之意。雖知之而不能不好之。奈何。曰此亦未能

真知而已。問真知者。真知人欲是不好物事否。

曰如克伐怨欲。不是要就克伐怨欲。上知得到。

只自就道理這邊看得透。則那許多不待除而

自去。若實見得大道理。要去求勝。做甚矜夸他

人。做甚求仁而得仁。又何怨。怨箇甚耳。目口鼻

四肢之欲。惟分是安。欲箇甚。見得大處分明。這

許多小小病痛都如水消凍解無有痕迹矣。人有不為也。而後可以有為。原憲却似只要不為。不理會有為一節。

南宮适問章 一則

問夫子不答南宮适之問。似有深意。亦有德如禹稷而不有天下者。孔子終身為旅人是也。亦有惡如羿莽而得其終者。盜跖老死於牖下是也。凡事應之必然。有時而或不然。夫子所以不答。君子之心亦為其所當為。而不計其效之在彼。

曰此意思較好。

或問子產章 一則

問管仲功可揜過否。先生久之曰。論語這般處。說得不分曉。大抵後十篇不及前十篇。如子路問成人處說得也。麓。

陳成子章 一則

討陳恒事。哀公若委之孔子。孔子須有計畫。以處之。必有道理以制三子。但有些罅縫。事便可成。問程子云。左氏記以魯之衆加齊之半。此非孔

子之言曰。聖人舉事。也不只理會義理。都不問利害也。須事勢可行。但須是先得魯之衆。方可用齊之半。蓋齊之半。雖未必難動。而魯之衆。却未便得他從。然此事。聖人亦必曾入思慮。但不專主此也。

子路問事君章 一則

問勿欺也。而犯之。曰。子路性勇。凡言於人君。要他聽。或至於說得太過。則近乎欺。如唐人諫敬宗遊驪山。謂驪山不可行。行必有大禍。夫驪山固

不可行。然以為有大禍。則近於欺矣。其實不失為愛君。而其言則欺。

君子上達章 一則

小人下達。今人錯做一件事。錯說一句話。不肯當下覺悟。便改。却只管去救其失。少間救得過。失越大。便是究乎污下。

或曰以德報怨章 四則

有德於我。自合饒潤他些。所謂公法行於上。私義伸於下也。以直報怨。當賞則賞之。當罰自罰之。

所以怨有不讎德無不報若以德報怨却是著
 意要饒他如呂晦叔曾受辱於賈昌朝後呂為
 相適朝廷治賈事呂乃乞寬賈之罪恐渠以為
 臣與有私怨賈竟以此得減其罪此以德報怨
 也然於大義都背蓋賞罰出於朝廷之公豈可
 以已意行乎其間
 以直報怨如其人舊與吾有怨今果賢邪則引之
 薦之果不肖邪則棄之絕之是蓋未嘗有怨矣
 老氏之言死定了孔子之言意思活移來移去

都得設若不肖者後能改而賢則吾又引薦之
 矣

問以德報怨寬身之仁也以怨報怨刑戮之民也
 此有病否曰也說得好以德報怨自家能饒人
 免得人只管來怨自家故曰寬身之仁也以怨
 報怨則日日相搥鬪打幾時是了故曰刑戮之
 民也

問在官遇故舊有公事如何曰權其輕重事小亦
 可周旋若事大只可依公問蘇章夜與故人飲

明日按之此莫大不是曰此成甚人只是以故
人爲貨如往時秦檜當國一日招胡明仲飲極
歡歸則章疏下又送路費甚厚慇懃手簡

莫我知也夫章

三則

不怨天不尤人與世都不相干涉方其下學人事
之卑與衆人所共無奇特聳動人處及其上達
天理之妙忽然上達去人又捉摸不著兩頭蹉
過了故人終不知知我者畢竟只是天理與我
默契耳以此見孔子渾是天理

問莫我知也夫子貢又不曾問夫子告之如何曰
論語中自有如此等處如告子路知德者鮮告
曾子一以貫之皆是一類此是大節目是箇有
思量底事要在不思量處得夫子說出三句大
抵都是退後說話不喚不響自在這裏理會如
水無石如木無風帖帖地在這裏人亦無緣知
得今人所以知於人者都是兩邊作得來張眉
努眼大驚小怪知我者其天平便是人不及知
但有天知而已以其道理與天相似也

孔子當初說這般話與子貢時必是子貢有堪說這道理模樣然孔子說了子貢又無以承之只曉得箇頭耳

公伯寮愬子路章

一則

孔子以道之興廢付之命以文之得喪任諸已道只是有廢興却喪不得文如三代禮樂制度若喪便掃地

賢者避世章

一則

隱者才德亦有高下長沮桀溺之徒設使天下有

道而出計亦無甚施設大抵有道則見不必待十分太平然後出來無道則隱亦不必待十分大亂然後隱去譬如天之將曉雖未甚明然自此只向明去不可不出為之用天之將夜雖未甚暗然自此只向暗去知其後來必不可支持總須見幾而作也

子擊磬章

一則

荷蕢聞磬聲便知夫子之心不念天下那箇人煞高如古人於琴聲中知有殺心者泉州醫僧妙

智大師後來都不切脉只見其人便知有甚病
又後來雖不見其人只教人來說因其說便自
知得此如他心通相似蓋其精誠篤至所以能
知

子路問君子章

四則

須看敬以直內氣象敬時內面一齊直徹上徹下
更無些子私曲若不敬則內面百般計較做出
來皆是私心欲利甲必害乙利乙必害丙如何
得安

上下一於恭敬聖人之敬薰天炙地不是獨修於
九重而天下之人侮慢自若也如漢廣之化可
見

體信達順卽是主忠行恕

程子曰聰明睿智皆由此出非容易道得是他曾
因此出些聰明睿智來

衛靈公篇

賜也女以予爲多學章

二則

聖人實是博學多識無一事不理會過只是聖人

之所以聖不在此而在一以貫之。今人有博學多識者，無一以貫之。然不博學多識，則又無物可貫。

永嘉有一相識，只管考制度，却不理會根本。一旦臨利害，那箇都未有用處。呂伯恭向來教人，亦云論語皆虛言，不如論實事，便要去攷史。陸子靜又只說箇虛靜云：全無許多事。顏子擇乎中庸，是不會學。善則一矣，何用更擇？子路唯恐有聞一聞之外，何用再聞，便都是禪家說話。聖人

道理都不恁地，直是周徧。

志士仁人章 一則

問：死生是大關節，工夫却在臨時，須是日用間不問事之大小，皆欲即於義理之安。然後臨死生之際，方打得透。若平常應事，義理合如此處，都放過，到臨大節，未有不可奪也。曰：然。

顏淵問為邦章 一則

顏子問為邦，孔子止告以四代之禮樂，却不及治國平天下之道。他那克己復禮，陋巷簞瓢，日用

問是理會甚事。想每日講論本領甚熟。只三代制度却不甚曾說。是生處。如堯舜禹。却只是就事上理會。及到舉大事。却提起那本領處。說問聖人就四代中各舉一事。亦只是立箇則例。教人以意推之。都要做此。否曰是。

吾之於八章

一則

問三代直道而行。曰此緊要在所以字上。三代蓋以直道行之於民。班固作景帝贊。引此語起頭。以明秦漢不易民而化。蓋謂民無古今。秦網密。

文峻故姦宄不勝。到文景恭儉。民便醇厚。只是此民在所施何如耳。此政得之。

知及之章

二則

知仁是明德工夫。下面是新民工夫。今自有此心純粹。更不走失。而於接物應事時。少些莊嚴意思。闐闐翼翼。自不足以使人敬。便是未善處。但須先有知仁做根本。方好去點檢其餘。動之不以禮。不是感動之動。是使民底意思。謂如使民去做這件事。亦有禮。禮字歸在民身上。如。

古所謂蒐苗獮狩就其中教之少長有序之事。便是使之以禮。蓋使民以此事。此事有禮存也。
按知仁莊蒞之主其持身感民豈復有非禮之事惟使民凡有所舉動須有禮存乎其間蓋欲使海內悉為知禮之民此即新民止於至善處故雖知仁莊蒞之後猶或有未盡耳

季氏篇

侍於君子章 一則

未見顏色是不能察言觀色。向時范某每奏事未嘗看著聖容。時某人為宰相云此公必不久居此未幾果以言不行而去人或問之云若看聖

容安能自盡其言自是說得好。但對人主言也。須看他意思如何。或有至誠傾聽之意。或不得已貌為許可。自家這裏亦可因而盡誘掖之方。不可泛然言之。使汎然受之而已。固有一般小人伺候人主顏色。迎合趨湊。但君子之察言觀色。用心自不同耳。對人主。要商量天下事如何。不看著顏色。只恁地說將去。

君子有三畏章 一則

三畏要緊全在知上。纔知得便自不容不畏。問知

朱子語類 卷三 三
有淺深纔知此道理。到做事有少差錯心也便
惕然曰。就他淺深中各自有不容已於畏者。

君子有九思章 二則

視會明、聽會聰也。只就視聽上理會去。如有一件
可喜之物在前。便要看。這便被他蔽了。須知有
箇義理可喜。此物在所不當視。這便是見得遠。
不蔽於眼前近底。所謂視遠惟明。仁義忠信之
言。將耳常常聽著。那許多不好說話。并閒說。莫
教入耳。所謂聽德惟聰。

聖人教人。不是理會一件。其餘自會好。須是逐一
做工夫。更反復就心上看。方知外面許多費整
頓。元來病根都在這裏。內外夾持起來。積累成
熟。方無些子滲漏。

陽貨篇

公山弗擾章 四則

問吾其爲東周乎。使聖人得行其志。只就齊魯東
方做起。如周何。曰。看臨時事勢如何。若使天命
人心有響合處。亦自不由聖人了。使周家修其

禮物作賓於王家。豈不賢於赧王之自獻其邑而滅亡乎。按聖人主意早定天人之機勢。早明而滅亡乎。豈亦如他人臨時裁奪耶。明言東周正欲為周地也。非問孔子猶說周至孟子都不王魯而使周賓也。問孔子猶說周至孟子都不說了。曰當時六國勢均力敵。不知孟子如何做。想也須滅一兩國。方做得湯東征西怨。南征北怨。武王滅國五十。此亦原不是殺不辜。行不義。我方行仁義之師。救民水火。你却抗拒不服。如何不伐得。聖人任用如此。後世都不然。如劉先主不取劉琮。而取劉璋。當初劉琮孱弱。若乘此

時。明其將為曹操所圖。起而取之。豈不正當。臨了却涿涿地去取劉璋。全不光明了。當初孔明便教他先取荊州。他却不服。唐太宗殺諸盜。惟不殺王世充。後却密使人殺之。便不成舉措。蓋當初世克立越王於東都。高祖立代王於關中。皆是叛煬帝。立少主以輔之事體。一般。故高祖負愧而不敢明殺世克也。此最可笑。負此子曲。更擡頭不起。若漢高祖之起。則不同。起自匹夫取秦。所以無愧。唐却是為隋之官。因其資而取。

之所以負愧也。要之自秦漢而下，須作兩節看。如太宗都莫看他初起，只取他濟世安民這意思，却多。

問公山弗擾果能用夫子，夫子果往從之，亦不過勸他改過自新而已。曰：聖人自不可測，是時名分亦未定。若謂弗擾爲季氏臣，不當畔季氏，勸令改過，臣順，此只是常法。聖人須別有措置，做時須驚天動地。

夫子墮三都，亦是瞞著三家做。如季氏已墮術中，

及圍成，公斂處，父不肯曰：若無成，是無孟氏也。遂連季氏喚醒。當時孟氏最弱，叔季爲強，強者墮之，而弱者反不可墮。因強者不覺，而弱者覺之，故也。然聖人處事，何故亦有做不成者？蓋有土有民，便伸縮在我。若靠他人，則只是羈旅之臣。若不見信用，便只得縮手而退。陽貨云：吾欲張公室也。人曰：家臣而欲張公室，罪莫大焉。此是當時一種議論。視大夫專命，以爲固然。問成既不可墮，夫子如何別無處置？便休曰：不久。

問夫子亦去魯矣若使久為之須別有道理

子張問仁章一則

問敏字於求仁功夫似不甚親切曰不敏於事便
有怠忽之意才怠忽便心不存而間斷多便是
不仁也

佛肸召章一則

謂聖人泊然無憂世之心固不可謂聖人視一世
未治常戚戚無聊亦非也但要出做不得又且
放下公山佛肸之召是他當時有這些好意來

接聖人聖人亦接他些好意思所以欲往待重
理過一番他終是不好人所以終於不去若陽
貨全無善意願見時便已不好故亦不能略感
聖人

子欲無言章一則

子欲無言非是言不能盡只是不消得說蓋已都
撒出來了如四時行焉百物生焉天又更說箇
甚底若是言不能盡便是有未盡處聖人言處
也盡做處也盡動容周旋無不盡惟其無不盡

所以不消得說

微子篇

微子去之章

二則

微子商之元子商亾在旦暮必著去之以存宗祀
若箕子比干則自當諫其死與奴特適然耳
箕子所處最難微子去却易比干則索性死他在
半上半下最是難所以易中特說箕子之明夷
利艱貞晦其明也內難而能正其志外雖狎狂
心却守得定

桺下惠為士師章

一則

桺下惠三黜不去便是和處他瑩然處與伯夷一
般伯夷如一顆寶珠常要在水裏桺下惠亦如
一寶珠在水裏也得在泥裏也得

子路從而後章

一則

纔說義便是合去就說道合則從不合則去即此
是義非單說要出仕為行義然道合則從不合
則去唯是出仕方見得纔說不仕便都無了這
義

子張篇

執德不弘章二則

執德須弘不可謂已得此道理不信更有道理須是既下工夫又下工夫已理會又理會不可理會得三二分便謂只消恁地弘便知道道理儘有自家心下儘有地步寬濶著得在。纔狹隘則容受不得不特不能容人自家亦不能容。纔有片善必自矜見人之善必不喜人告之以過亦不受從狹隘上生萬般病痛。

博學而篤志章一則

程子說近思以類而推只是就近推將去如十五志學至四十不惑學者尚可意會若自知命以上則雖苦思力索終摸索不著縱然說得也只是臆度除是自近而推漸漸看將去則自然見得。

子夏之門人小子章三則

理無不在本末精粗皆要從頭做去不可揀擇此所以教人有序也。

事有小大理却無小大合當理會處使用與他理會不可說這是粗底不理會只理會那精底又不可說那洒掃應對便是精義入神更不用做其他事也。

問洒掃應對是其然必有所以然者是如何曰若無誠意如何洒掃應對。

孟子言孟莊子之孝章一則

問孟莊子何以謂之難能曰人固有用父之臣者然稍拂他私意便容不得亦有行父之政者於

私欲稍有不便處便行不得古今似此者甚多唐太宗為高宗擇許多人如長孫無忌褚遂良之徒高宗因立武昭儀事便不能用季文子相三君無衣帛之妾無食粟之馬到季武子便不能如此便是不能行父之政以此知孟莊子為難能。

堯曰篇

堯曰咨爾舜章一則

與滅國繼絕世舉逸民此聖人之大賞兼弱攻昧。

取亂侮亡此聖人之大罰。

子經說卷三

此句與前句同。五刑之罰。則不謂刑。而謂之取亂侮亡。此聖人之大罰。此句與前句同。五刑之罰。則不謂刑。而謂之取亂侮亡。此聖人之大罰。



The left page of the book is mostly blank, showing the texture and color of the aged paper. There are very faint, illegible markings and bleed-through from the reverse side of the page.

